

BILJEN FONDACIJE HASTOR

decembar, 2015. godine



NOVOSTI

Fondacija Hastor dodijelila 15 dodatnih studentskih stipendija

Decembar je mjesec čarolije i darivanja. U Fondaciji Hastor vlada praznično raspoloženje. U duhu prazničnog darivanja i u skladu sa svojom misijom, Fondacija Hastor odlučila je dodijeliti dodatne stipendije za studente sa bosanskohercegovačkih univerziteta.



Nakon objavljenog Konkursa za dodjelu studentskih stipendija, u periodu od 14.10. do 31.10.2015. godine pristiglo je 278 prijava. Proces selekcije je vodila HR specialist Merima Zukić, bivša stipendistica Fondacije Hastor. Osnovne uvjete Konkursa ispunjavalo je 199 kandidata te je za 199 kandidata izvršeno bodovanje putem softvera. Nakon izvršenog bodovanja utvrđeno je da 49 kandidata ima najveći broj bodova te su pozvani na prvi intervju. Nakon prvog intervjuja, 21 kandidat dobio je priliku za finalni intervju. U finalnom intervjuu su članovi Komisije za dodjelu stipendija Fondacije Hastor razgovarali sa 21 kandidatom te odabrali 15 najboljih kandidata.

Tako je 15 najboljih kandidata, potpisivanjem Ugovora o stipendiranju, postalo dio Fondacije Hastor i dobilo priliku za ostvarenje svojih snova i jednu ogromnu potporu na putu ka uspjehu.

"Svi kandidati koju su ušli u uži krug selekcije su izuzetno uspješne mlade osobe, sa velikim ambicijama. Međutim, uspjeh koji postižu ih ne spriječava da budu i društveno angažovani a ta dva segmenta su upravo ono što Fondacija Hastor najviše vrednuje. Neke od priča koje smo čuli zaista fasciniraju: od mladića koji je dvije godine radio kao konobar kako bi uštedio za školarinu do mladića koji do 2017. planira osnovati vlastiti elektronički laboratorij... Nešto što se provlači kroz sve životne priče naših kandidata jeste činjenica da svi rade ono što vole i vjeruju da će ih bez obzira na sve, posvećenost, trud i upornost dovesti do željenog cilja. Radujemo se što ćemo imati priliku podijeliti misiju Fondacije Hastor upravo sa ovim mладим ljudima iz različitih dijelova BiH te da će zajedno sa nama nastaviti sa ostvarivanjem vizije Fondacije Hastor." kaže Nadira Berbić.

Ove godine, Fondacija Hastor stipendira 280 novih učenika i 15 novih studenata širom BiH, tako da će u 2015./2016. podržati školovanje blizu 1.400 učenika i studenata iz svih dijelova BiH.



Dž. Otuzbir

STIPENDISTI IZ KALESIJE USPJEŠNO ORGANIZOVALI PETU HUMANITARNU AKCIJU

Samra Bećić i Nermina Imamović iz Kalesije su bivše stipendistice Fondacije Hastor koje su po završetku svojih studija, odlučile ostati volonteri fondacije i nastaviti pomagati našim stipendistima. Osim što su usmjeravale i pomagale u obrazovanju svoju grupu učenika, organizovale su i nekoliko humanitarnih akcija za građane kojima je potrebna pomoć. Ideje za humanitarne akcije su dolazile spontano, a najčešće od njihovih stipendista koji silno žele da pomognu, kad god su u mogućnosti.

Samra i Nermina su nedavno organizovale petu po redu humanitarnu akciju. Ovaj put su prikupljale pomoć za Selmu Suljić, koja

je od ove godine i stipendistica Fondacije Hastor. Selma je rano ostala bez majke, tako da živi samo sa ocem u kući koja je neadekvatna za normalan život. Zajedno sa stipendistima Fondacije Hastor došle su na ideju da kroz njihovo sudjelovanje i podršku obezbijede Selmi sredstva koja će joj vratiti nadu i osmijeh na lice. Akciju su sproveli u nekoliko škola i sakupili iznos od 422 KM, od čega su obezbijedili kuhinju u školi za dva mjeseca, kućne namirnice, odjeću i obuću, kao i sredstva za ličnu higijenu. Od ostatka novčanih sredstava koja su sakupljali za Selmu, iznos od 100 KM su predali osobi koja se brine o dječaku Harizu Mujkiću, koji je ostao bez oba roditelja, a živi u kući sa 19-ogodišnjim bratom. Uz njihovu pomoć Hariz

je ostvario skroman početak u kojem nema podršku roditelja, ali zato ima podršku stipendista i volontera Fondacije Hastor. Naše volonterke su ponosne na njihove stipendiste, koji su opet pokazali svoju humanost i želju da nastave pomagati svojim kolegama kao i one kojima je pomoći potrebna.

Samra Bećić je ove godine završila Edukacijsko-rehabilitacijski fakultet u Tuzli, na odsjeku za Poremećaje u ponašanju, a Nermina Imamović je ove godine diplomirala na Tehnološkom fakultetu u Tuzli, na odsjeku za Prehrambene tehnologije. Obje su ostale volonterkе Fondacije Hastor, za koju kažu da je ispunila veliki san malom čovjeku. Njih dvije vrlo aktivno rade sa 38 stipendista sa cijelog područja općine Kalesija.

S.Kosovac



FONDACIJA
HASTOR

Obrazovanje - izbor pobjednika!



FONDACIJA HASTOR PODRŽALA IMPLEMENTACIJU PROJEKTA „PISANJE PROJEKATA PO STANDARDIMA EUROPSKE UNIJE“

17., 18. i 25. oktobra održane su radionice u sklopu realizacije projekta „Pisanje projekata po standardima Europske unije“. Projekat je implementiralo udruženje Centar za razvoj i socijalno poduzetništvo u partnerstvu sa udruženjem Svitnje. Prepoznavši vrijednost i potrebu implementacije jednog ovakvog projekta Fondacija Hastor je odlučila pružiti svoju podršku pri samoj realizaciji. Svoju podršku pružila je i općina Novi Grad u čijim prostorijama je izvršena svečana dodjela certifikata učesnicima ovog projekta.

Motivisani uspjehom postignutim na svom prvom projektu, članovi udruženja Centar za razvoj i socijalno poduzetništvo su odluči-

implementirati još jedan projekat pod nazivom „Edukuj se i pokreni biznis“ te na taj način još jednom doprinijeti unapređenju svoje zajednice i društva. Radionice u sklopu ovog projekta održat će se 12., 13. i 27. decembra na području općine Stari Grad. O ciljevima projekata, utiscima i očekivanjima nešto više nam je rekao Haris Fadžan, marketing menadžer udruženja Centar za razvoj i socijalno poduzetništvo:

„Projektom Pisanje projekata po standardima Europske unije smo željeli pokazati da postoji način na koji možete realizovati svoje ideje, profesionalno se usavršiti u različitim sferama poslovnog života i istovremeno raditi na rješavanju problema u svojoj okolini. U

projektu je učestvovalo 34 polaznika seminara, koji su pokazali nivo kreativnosti, ozbiljnosti i posvećenosti radu, koji je premašio sva naša očekivanja te učinio ovaj seminar uspješnim i produktivnim. Svi učesnici su imali samo riječi hvale i za predavača i za organizaciju, tako da mogu reći da smo zadovoljni sa realizacijom ovog projekta. Projekat „Edukuj se i pokreni biznis“, naš sljedeći projekat, ima za cilj edukaciju građana i građanki o zapošljavanju i samozapošljavanju te o oblasti mikrobiznisa. Edukaciji bi trebalo prisustvovati 25 polaznika, za koje se nadamo da će svoje druženje sa našim predavačem maksimalno iskoristiti. U tom slučaju, možemo seradovati još jednoj uspješnoj realizaciji.“

Fondacija Hastor je pružila podršku i za realizaciju ovog projekta uz nadu da će ih biti još mnogo, te da će i drugi prepoznati važnost realizacije ovakvih projekata.

E. Adilović



UČITELJEV KUTAK

VOLONTERI FONDACIJE HASTOR NA TERENU

//14 studenata +56 srednjoškolca + 14 osnovaca = 84 stipendista//

Sitnić Rabiju (volontira sa 9 srednjoškolaca) i Huseinović Silvada (volontira sa 2 osnovaca) posjetili na volontiranju u prostorijama Fondacije Hastor – Moja Banka u Sarajevu 27.11.2015 oko 16 sati. Prvo što zapazih bijaše Pravilnik Fondacije Hastor na stolu ispred Rabije. Rabija mi reče da joj je danas prioritet da upozna prisutne sa pravilima Fondacije Hastor. Medju prisutnima prepoznah učenicu iz Ilijaša, učenika iz Delijaša i još jednu učenicu iz Konjević Polja. Prepoznah i učenicu i učenika osnovne škole iz Hotonja. Dok ja posmatram djecu Rabija mi reče da joj nije došla Fata Ahmetspahić. I dok ona čita ime i prezime – meni već stiže u glavu slika Gurdića sela


udaljenog preko 15 kilometara od Olovskih Luka. Sjetih se i da joj je otac ljetos preselio na Ahiret i sad Fata živi sa majkom i mlađom sestrom od dječjeg doplatka, socijalne pomoći i stipendije Fondacije Hastor što ukupno ne prelazi 300 konvertibilnih maraka. Silvad mi objasni da se nije mogao dogovoriti sa direktorom Osnovne škole iz Hotonjaza prostor u školi. Zamolih ga da pokuša da se snađe za prostor na području Hotonja jer je i njemu bliže obzirom da stanuje u Vogošći.

Čitam u najavama Murga Mirza (volontira sa 3 osnovaca) zakazao 28.11.2015. od 9 do 13 sati u Osnovnoj Školi „Srednje“ u Srednjem. U devet sati pred školom u

Srednjem nema nikoga. Prozivam Mirzu, ne javlja se. Prozivam roditelje djece iz Srednjeg. Jedan od njih mi reče da je u Vogošći sa djetetom i da je tu Mirza. Zamolih da mobitel da Mirzi. Mirza se prvo izvinu što nije obratio pažnju da mu mobitel zvoni, a onda mi reče da je on izvijestio administraciju o promjeni lokacije.

U posjeti Bašić Adni (volontira sa 4 osnovca) u osnovnoj školi „Zahid Baručić“, u Vogošći sretoh se i sa Mirzom i porazgovaramo o nesporazumu. Adna me upozna sa programom koji je pripremila i ostvarila za danas. Kaže da danas upoznaje djecu sa pravilima ponašanja, a ima i obaveznu temu koju želi obraditi.

Arnautović Enes (volontira sa 3 osnovca) i Merdžić Adelisa (volontira sa 1 osnovcem) 29.11.2015. u 10 sati u školi „Hašim Spahić“ u Ilijašu u toploj učionici razgovaraju sa učenicima osnovne škole stipendistima Fondacije Hastor o fondaciji i njenim pravilima. Svidje mi se kako su ovo organizovali, kratko porazgovarali sa njima pa ih ostavili da dovrše uplanirano. Džindo Melisa (volontira sa 6 srednjoškolaca) se smjestila sa srednjoškolcima u Tržnom centru Bingo u Ilijašu kratko poslije 11 sati 29.11.2015. Razgovaramo o dolasku i održavanju ovih druženja. Melisa reče





predavanje a neki stipendisti ne dođu. Pomenu mi Dedajić Amar. Okrenuh broj javi mi se Azemina majka Amarova i kaže da je on morao otići da radi. Pitam je šta je sa volontiranjem? Šuti! Razumih tu šutnju.

Halilović Almedin i Mandžić Ibrahim (volontiraju sa 6 srednjoškolaca) zakazali volontiranje u prostorijama Fondacije Hastor 30.11.2015. od 14,30 do 16,30 sati. Oko 15 sati posjetih ih pa im moradoh prigovoriti da se nisu dovoljno potrudili da im mogu prisustvovati svi koje su pozvali jer su prihvatali da volontiraju iako im je jedan broj stipendista rekao da u tom terminu ima redovnu nastavu u školi.

Ulazim u Omladinski centar u Novom Travniku u 9,30 sati 5.12.2015. gdje me prijatno iznenadiše Vrhovac Lucija i

Smajić Šejla (volontiraju sa 20 srednjoškolaca) koje u krugu sa 20 srednjoškolaca sjede i druže se. Ispred Lucije laptop sa Pravilnikom Fondacije Hastor na ekranu. Objasni mi šta su pripremili za danas. Iz razgovora sa srednjoškolcima saznadoh da ih ima iz Hlase sela udaljenog preko 20 kilometara sa jedne strane i Rostova sa druge strane približno iste udaljenosti. Kažu mogu dolaziti jer im ova druženja pričinjavaju zadovoljstvo.

Durmo Elma i Hajdar Semir (volontiraju sa 9 srednjoškolaca) u Osnovnu školu „Zahid Baučija“, u Vogošći 6.12.2015. stižu tačno u 9 sati. Odmah otpočinjem razgovor o programu za danas. Utrkuju se da mi kažu šta su pripremili i kako će to prezentirati. Svidje mi se to pa poslije kraćih uputa pozdravih se i krenuh dalje.

Ramo Hastor


U 11 sati stigoh u Tržni centar Suša u Visokom, a tamo za jednim stolom Burko Nejla (volontira sa 1 osnovcem i 6 srednjoškolaca) razgovara sa stipendistima Fondacije Hastor tri srednjoškolca i jedna učenica osnovne škole. Kad se pozdravimo objasni mi da joj svi nisu došli. Pomenu mi Dedić Adema. Sjetih se Olovskih Luka i njegova oca srčani bolesnik, neostvarena penzija a čovjek u godinama još jednog sina školuje, mora raditi i što ne može - karta do Visokog i nazad oko 50 konvertibilnih maraka. Uhvatih sebe u odsutnosti od stvarnosti pa protrljah sljepoočnice i otpočeh razgovor o organizovanju ovih druženja kao i o temama koje su obavezne i koje će ona uplanirati pa poslije kraćih uputa pozdravih se i krenuh dalje.



FONDACIJA
HASTOR

Obrazovanje - izbor pobjednika!

STIPENDISTA MJESECA



Najistaknutija stipendistica Fondacije Hastor u mjesecu decembru je bila **Sibela Fetinci** i time je zaslužila titulu Stipendiste mjeseca.

Ona je stipendistica Fondacije Hastor već osmu godinu, i kako i sama navodi, jedva da se i sjeća perioda svog života koji nije isprepleten pozitivnim iskustvima kroz Fondaciju Hastor. Biti članicom ove velike porodice je za nju privilegija te na Fondaciju gleda kao zvijezdu koja joj osvjetljava put i pomaže da postane kompletnija i odgovornija ličnost. Kao jednu od najbitnijih osobina koju je stekla u Fondaciji Hastor je odgovornost, što se prenijelo i u druge sfere njenog života. Sibela je završila Srednju farmaceutsku školu Travnik' u Novoj Biloj kao učenica generacije. U Fondaciji je stekla i dodatni motiv za uspjehom, što potvrđuje i činjenica da je jako uspješna u ispunjavanju

fakultetskih obaveza. Naime, Sibela je druga godina na Fakultetu zdravstvenih studija u Sarajevu, na Odsjeku za radiološke tehnologije.

U nastavku pročitajte šta za Sibelu znači biti dijelom ove velike porodice:

....Fondacija mi puno znači. Stipendija koju mi pruža je olakšala moje školovanje i obezbjedila mi dolazak u Sarajevo i studiranje na fakultetu koji je oduvijek bio moj san. Također, volontiranjem u Fondaciji Hastor sam upoznala mnogo novih ljudi s kojima sam postala prijatelj. U budućnosti se nadam da ću postati inžinjer radioloških tehnologija i raditi u bolnici, okružena ljudima koji svakodnevno nesebično pomažu drugima..."

N.Ohran

LITERARNI RAD MJESECA

Da ti nešto bude, gledala bih godinama u bijele zidove, nijemo i nepomično,
dok bi naše slike na stolu bile uredno i lijepo složene. Da ti nešto bude, roletne bih na prozorima
spustila, svjetla pogasila, telefon isključila, od života se odvojila. Da ti nešto bude, ni jednu jedinu
pjesmu ne bih napisala, ni glasa pustila, samo bih život nijemo posmatrala. Da ti nešto bude, ne
bih se više imenom zvala, ne bih ni zrak udisala,
ni ruže mirisala,
ne bih uzdah pustila,
već bi suze k'o bisere nizala,
pazivši da ih niko ne dotakne. Da ti nešto bude, u dim bih se pretvorila
u visine bih se vinula. Da ti nešto bude,
životom bih platila da ti oči
još jednom ugledam,
da dodir ruke još jednom osjetim,
i da srcem zemlju dotaknem...

...jer nije to ono kada znaš da vrijeme dolazi i odlazi, i kada suzama ovlažiš trepavice, pa tuga
zastane u njima

i ti možeš da dođeš i da se vratиш kada poželiš.

jer nije to ono kao kada znaš da će proći, da ćeš odbolovati i da će se nešto promijeniti,
ovo je ono kada znaš da mrtav živiš, da živ umireš...

Ovo je ono kad sebe daš a ne pitaš šta može s tebe biti,
ovo je ono kada se svjesno ljubavi predaš i život na dlanu pokloniš. Da ti nešto bude,
mene ne bi bilo,

ni vremena, ni suze, ni riječi, ni glasa, ni ljudi, ni života,
ni želje, ni srca...

Da ti nešto bude, našla bih put do tebe,

životom bih platila da te pronađem. Ruku bih na sliku spustila i za tobom dugim korakom pošla,
da ti kažem da je tvoj put do mene

još uvijek isti kao moj put do tebe. Da ti nešto bude,
vidjeli bi ljudi

da ljubav odista granice nema. Da ti nešto bude,

potopila bih se u moru ljubavi

i pričalo bi se vjekovima, da se i od ljubavi
može umrijeti.

Zemira Bektić

Ilustracija: Nadira Hrnčić



IMPRESSUM

FONDACIJA HASTOR
Bulevar Meše Selimovića 16. 71000 Sarajevo
033 774 789 033 774 823
fondacija@hastor.ba

REDAKCIJA

Džulisa Otuzbir
Sadžida Kosovac
Hanka Mujkić
Nihada Ohran
Emina Adilović
Nadira Berbić

Pripremu ovog izdanja Biltena pomogla je Raiffeisen banka
u saradnji sa kreativnom agencijom McCann Sarajevo



McCANN
SARAJEVO



FONDACIJA
HASTOR

Obrazovanje - izbor pobjednika!